

En coneccion cu su concierto pa dia di Mama

Edjean Semeleer a lanza 'Mi mitad pa eternidad' ayera

ORANJESTAD — Dialuna mainta Aruba a sera conoci un biaha mas cu un cancion nobo di e exitoso hoben artista Edjean Semeleer. 'Mi mitad pa eternidad' ta e single nobo cu Edjean a lanza den oranan di mainta na Magic FM durante di e programa di Ruben Garcia. Manera cu Edjean mes a splica durante di entrevista, e cancion aki ta pertenece na un CD nobo cu Edjean ta trahando riba dje pa wordo lanza na Juni. 'Loke cu mi ta haciendo cu e produccion aki ta presentando

mi mes di un manera mas madura y diferente na e pueblo di Aruba', Edjean a bisa, 'Tur hende ta custumbra cu e 'Baby di Aruba' pero tempo a pasa y mi a crece y ta desea pa Aruba conoce mi awo di un manera diferente y den diferente tipo di musica no solamente como un cantante di temporada'. E cancion aki ta a wordo skirbi pa Chucho Hoek y musicalisacion a keda den man di martin Buitenweg. 'Mi a dicidi di lanza e cancion aki awo pa cuminsa pone e pueblo di Aruba na altura

di loke cu ta na caminda pa Juni y tambe pa cuminsa musta e Mama nan di Aruba kico nan por spera durante di nan concierto riba nan dia special', Edjean a sigui bisa. E concierto aki lo tuma luga diadomingo 13 di Mei den Cas di Cultura. Riba stage Edjean lo wordo acompaña pa e banda di musiconan estelar bou direccion di Hildward Croes y pa algun otro cantante invita cu sigur lo haci e anochi

aki un spectacular. 'E cancion aki tambe lo ta den e repertorio di e anochi aki y varios otro mas cu lo pone e Mama nan presente goza sigur di henter e anochi riba nan dia special', Edjean a bisa.

Manera semper Magic FM ta honra nos cantantenan local y no a duda ningun rato y a haci e cancion nobo aki di Edjean Semeleer e 'Hit Pick of the Week', e cancion aki lo wordo toca cada ora y fuera di esei

e ta na disposicion di Aruba henter.

Hopi exito Edjean cu bo proyectonan na caminda. Alavez Edjean kier a recorda e yunan pa yena e formulario cu ta saliendo di Bon Dia Aruba pa y trece bek na Bon Dia Aruba poniendo e den e tombola pa aki algun siman lo por saca e Mama nan VIP cu lo gana nan stul special pa e concierto pa dia di Mama diadomingo 13 di Mei.

"Mi Mitad pa Eternidad"

Composicion: Felix (Chucho) Hoek

Arreglo: Martin Buitenweg

Interprete: Edjean

E dia cu mundo stop di gira,
E dia cu solo stop di kima,
Esey lo t'e dia cu mi lo stop di stima bo

E dia cu biento stop di supla,
E dia cu luna stop di lombrá,
Esey lo t'e dia cu mi lo stop di stima bo

Amor, bo t'e lus di mi bida,
Bo ta mi aire, mi guia,
Mi mitad pa Eternidad
Amor, bo t'e rason pa mi biba.
Mi fontein di energia,
Mi mitad pa Eternidad

E dia cu streanan stop di briya,
E dia cu oceanonan seca,
Esey lo t'e dia cu mi lo stop di stima bo

E dia cu parhanan stop di canta,
E dia cu plantanan stop di florea,
Esey lo t'e dia cu mi lo stop di stima bo

Amor, bo t'e lus di mi bida,
Bo ta mi aire, mi guia,
Mi mitad pa Eternidad
Amor, bo t'e rason pa mi biba.
Mi fontein di energia,
Mi mitad pa Eternidad

Bo sonrisa ta e fuente di inspiracion,
Bo caricia ta alimenta mi curason.

Amor, bo t'e lus di mi bida,
Bo ta mi aire, mi guia,
Mi mitad pa Eternidad
Amor, bo t'e rason pa mi biba.
Mi fontein di energia,
Mi mitad pa Eternidad

